

ጾኑሲ ማደ''ም ዳኪንቴ ጳውሎሴ ተቶም ዳኬ ኪኢቶ'' ዓይያ ካር''

ተቶ ዓይሁዴ ማዓባኣ ዓሲታጾ ኪሪሰቶሴ ጉሙርቂ ላኣሚንቴ ዓሲ ማዓዛ፣ ጳውሎሴና ዎላ'' ኮዦ ሃይሶ ኬኤዚያ ማደ'' ዓዛኮ ዴማ'' ማዓ ማዳያኬ፤ ጳውሎሴ ሓያ ኪኢቶ'' ጻኣፔሢ'' ዴጌ ናይታጾ ዓዛና ዎላ'' ማደ ተቶም ማዓዛ ተቶ ዬኖ ዎዶ''ና ቁርፃሴይዳ ዓኣ ሽኢጲያ ማኣር ማደ'' ሃንቲ ሃንቲ ዛጋያኬ። ሃና ኪኢታ'' ሃይሦ ዴኤፕ ዴኤፕ ማሊሢ ዓርቁያኬ።

ፔታሳጾ፡- ቁርፃሴ ሽኢጲያ ማኣር ዓሶ ዎይሢ ዓሶኮ ማሊያ ዎምዒ ማዓንዳያ ኮይሳቲያ ባሼ ዒኢካ ዓኣ ዓሶኮ ፑርቶ ማሊያፕ ዓቁያና ዎይሢ ዓሳ ዎምዒ ማዓንዳያ ኮይሳቲያ ተቶም ላቲ'' ኬኤዚንቴ፤ ላምዓሳጾ፡- ሽኢጲያ ማኣርይዳ ዓኣ ዴማ ዴማ ዓሶ ጌይያ ዓቲንቆ ጋርቾ፣ ላኣሎ ጋርቾ፣ ዴጌ ዓቲንቆንታ ዓሶም ማደ ዓሶንታ ዎምይዒ ዒ ዔርዛንዳቲያ ተቶም ዞርናያኬ፤ ጋፒንያይዳ ኪሪሰቶሴ ጉሙርቃ ዓሶኮ ዓኣያ ማዓኒ ኮይሳ ማሊሢ ኬኤዛ፤ ዬይያ፡- ዓሲና ኮሽኪ ዒጊንቴ ናንጎንዶ ጎይሢና ሽኢጲያ ማኣር ዓሶ ባኣካ'' ዎሊ ዒዲሢንታ ማርሞንታ ዴማዲሢንታ ባኣያ ማዒ ናንጋንዳጉዲ ዓሶ ዞርም ጌይ ተቶ ዓይሣያኬ።

ማፃኣፔላ ዴማ ዴማ ዓርቁ ባኮ

- ዓይያ ካር'' 1፡1-4
- ሽኢጲያ ማኣር ዎይሢ ዓሶ ዛላ ኬኤዚንቴ ባኣዚ'' 1፡5-16
- ሽኢጲያ ማኣርይዳ ዓኣ ዴማ ዴማ ዓሶ ዛሎ'' ኬኤዚንቴ ባኣዚ'' 2፡1-15
- ጳውሎሴ ዞሬ ዞር''ና ላቲ'' ኬኤዜ ባኮ 3፡1-11
- ጋፒንሢ ሓይሴ 3፡12-15

1 ጾኑሲም ማደያ ሃሣ ዬሱሰ ኪሪሰቶሴ ማደ''ም ዳኪንቴያ ማዓ፥ ጾኑሲኮ ዶኑሪንቴዞንሢ ጾኑሲ ጉሙርቁያ ዛሎ'' ኬኤዚ ማኣዳ''ኒና ጾኑሲ ካኣኮ''ኮ ጎኑሞ ዔርዛኒ ዶኑሪንቴ ጳውሎሴይዳፕ፡-
 2 ዔያቶኮ ናንጊና ናንጊኮ ሃጊ ማዓንዳ ዎዛ ዓኣያ ማዓንዳ፤ ጾኑሲ ማርጌ ዎዴኮ ቤርታ ዒንጋኒ ጫኣቁ ናንጊና ናንጎ ዔያታ ዴንቃንዳ፤ ጾኑሲ ፔቴ''ታጾ ሉኡቁዎሴ። 3 ዬና ዎዳ'' ሄላ''ዛ ጾኑሲ

ዴያ ፔ ቃኣሎ"ና ፔጋሲ ዳዌኔ፤ ዴይ ቃኣላ" ታ ማዳንዳጉዲ ታኣም
ዒንጊንቴሢር ኑና ዳቁሻ ያኦዛሢ ዒይሢያ ጎይያ ታ ኬኤዛኔ።

4 ኑኡኒ ቢያሢ ጉሙርቃ፡ ያኦሲ ጉሙርቁያ ዛሎ"ና ታኣኮ ጎኔ
ናዓሢ ማዕ፡ ጥቶም፤

ያኦሲ፡ ዓዳሢና ኑና ዳቁሻ ዴሱሰ ኪሪሰቶሴናይዳፓ ማዕ ኮሹሞ
ዒንጊያና ዎዛና ኔኤም ማዖንጎ።

ጥቶ ቁርዳሴይዳ ማዳንዳጉዲ ዓይሢንቴ ባኮ

5 ታ ኔና ቁርዳሴይዳ ሃሹ"ሢ ዒኢካ ፓጩ ባኮ ኩንሣንዳጉዲና
ኔ ማዳንዳጉዲ ታ ኔኤም ዓይሢ ጎይያና ሺኢጲያ ማኣር ጨሞ
ካታሞይዳ ካታሞይዳ ኔ ዶኦሪንዳጉዲ ጌሪከ። 6 ሺኢጲያ ማኣር
ጨማ፡- ደንኪንቴዎና ፔቴ" ለኣሊ ዔኬያ፡ ዓይሢንቴዎና ማዒሢና
ጊንሣ ሃሣ ማቾ ማዒባኣያና ላሂ ላሂ ፔ ሱ"ንያ ፑርቲሱዎና፤ ዴያጉዲ
ሃሣ ናኣታ" ዒዛኮ ኪሪሰቶሴ ጉሙርቃያ ማዒ ኮይሳኔ። 7 ሺኢጲያ
ማኣር ዎይሣ ዓሳ፡- ያኦሲ ማዶ" ማዳንዳጉዲ ጉሙርቁ ዒንጎና ዓሲ
ማዕሢር ደንኪንቴዎ ዓሲ ማዒ ኮይሳኔ፤ ጌይያ፡- ሄርሺንቴዎና፡
ዑከና ደጋዲዎና፡ ዑሸኪ ማሢንቴዎና፡ ዓሲና ዣሉዎና፡ ዔርቱዎ
ጎይሢና ፔና ማኣዳ"ንዳ ባኣዚ" ዔካኒ ኮውዎና፤ ጌይያ፡- ሚኢሼር
ጎይይቁዎና ማዒ ኮይሳኔ። 8 ዴያይዳፓ ሾኦቹ ዔካያ፡ ኮሺ ማዕ
ባኣዚ" ናሸካያ፡ ፔና ዔሪ ዎይሣያ፡ ፒዜ ዓሲ፡ ዒናና ዓኣ ዓሲ ሃሣ
ኮይሳ ጎይሢ ናንጋያ ማዖንጎ። 9 ዒ ዔሪ ጎይያጉዳያና ጉሙርቁንታያ
ማዕ ኪኢቶ" ኮሺ" ዓርቃያ ማዒ ኮይሳኔ፤ ዴያይዳጎና ማሌ" ዓሶ
ዘራኒና ዴያ ዒፂ ማካ ዓሶዎ ጎራ"ኒ ዒ ዳንዳዓኔ።

10 ዓይጎር ጌዔቴ ዓይሁዶ ፃጸፓ ማዕያ፡ ዓይሢንቴዎና፤ ሃሣ ጉሪ
ጌሰቲ ጌሰቲ ሺራ ጌሻ ሚርጌ ዓሲ ዓኣሢርከ። 11 ዴያ ዓሶ ዚቲዳኒ
ኮይሳኔ፤ ዓይጎር ጌዔቴ ዔያታ ፒዜ ማዒባኣ ጎይሢና ሚኢሼር
ጎይይቁ ጎይይቁ ዔርዛኒ ኮይሱዎ ባኣዚ" ዔርዚ ዔርዚ ፔቴ" ማኣር
ዓሶ ካራና ፑርቲሳኔ። 12 ዔያቶኮ ዣይሰኬይ ዔያቶ ዛሎ" ኬኤዛያ፡-
«ቁርዳሴ ዓሳ ቢያ ዎዳ ሉኡቃያ፡ ፑርታ ሶዎ ማዕያ፡ ሃሣ ቤልፃዳያና
ሙኡዚ" ዓሲከ» ጌዔኔ። 13 ዴያ ዓሢኮ ማርካታ ጎኔከ፤ ዴያር
ፒዜ ዔያታ ያኦሲ ጉሙርቃያ ማዒንዳጉዲ፡ 14 ዓይሁዶ ዓሶኮ
ኬኤዚ ሺር ሓይሶ ዔያታ ዔኩዎጉዲና ጎኩሞ ዒፃ ዓሶ ዘሮ" ዔያታ
ዎይዙዎጉዲ ኮሺ" ዔያቶ ጎሪ። 15 ዒኖ ጌኤዣ ዓሶም ቢያ ባኣዚ"
ጌኤሺከ፤ ዒኖ ፑርቶ ዓሶና ያኦሲ ጉሙርቁዎና ዓሶም ጋዓንቴ
ጌኤሺ ማዕ ባኣዚ" ባኣሴ፤ ጉቤ ዔያቶኮ ዒኖና ማሊያና ፑርቲያከ።

1:4 2ቆር. 8፡23፤ ገላ. 2፡3፤ 2ፃሞ. 4፡10። 1:9 1ፃሞ. 3፡2-7።

16 ዔይታ፡- «ኮኡኒ ያኦሲ ዔራኔ» ጋዓኔ፤ ዔይታ ማዳ ማዳ "ና ጋዓንቴ፡- «ያኦሲ ኑ ዔራፍቤ» ጋዓ ዓሲ ማዓኔ፤ ዋይቲ ጌዔቲ ዔይታ ዒሣ ዓሲ፤ ዓይሣንቴዋ ዓሲ፤ ሃሣ ፔቲ"ታዎ ኮሺ ማዳ ማዳኒ ዳንዳዑዋያ ማዔሣረኬ።

2

ፒዜ ማዔ ዔርዚሣ

1 ኔኤኒ ጋዓንቴ ፒዜ ማዔ ዔርዚያና ዋላ" ጊኢጋያ ማዔ ባኣዚ" ዔርዜ፤ 2 ዓቲንቆ ጋርቻ፡- ኮይሳ ጎይዎ ናንጋያ፡ ፔ ቦንቾ ካፓያ፡ ዔኤቢ ዔሪ ማዳያ፡ ያኦሲ ጉሙርቁሣና ናሹሞዋ ዓኣያ ሃሣ ጊቢ" ዳንዳዒሣናኣ ደዲ ዓሲ ማዓንዳጉዲ ዔይቶ ዘሬ። 3 ዔይታዲ ሃሣ ላኣሎ ጋርቻ፡- ኮይሳ ጎይዎ ናንጋያ፡ ቦንቾ ፔኤሲ" ካፓያ፡ ዓሲ ደንኩዋያ ሃሣ ዑሺ ናሽካያ ማዑዋጉዲ ዔይቶ ዘሬ፤ ዔይይዳፓ ዔይታ ኮሺ ማዔ ባኣዚ" ሜሌ" ዓሶ ዔዔርዚያ ማዎንጎ፤ ዔይያ፡- 4 ሎዔ ዳጌ ላኣላ ፔኤኮ ዓኒንሣና ናኣቶ"ና ናሽካንዳጉዲ፡ 5 ዔኤቢ ዔሪ ማዳያና ዒኔ ጌኤሺ፡ ማኣሪ ማዳ ማዳያ፡ ኮሺ ማዔያ፡ ፔኤኮ ዓኒንሣም ዓይሣንታዎ ማዓንዳጉዲ ዔይታ ዔርዘንጎ፤ ዳጌ ላኣላ ያዲዳቲ ያኦሲ ቃኣሎ" ቦሃንዳ ዓሲ ባኣሴ።

6 ዔይታዲ ላኣሎ ዔኬ ዓቲንቆ ዳጌሣ' ፔና ዔሪ ዋይሣንዳጉዲ ዔይቶ ዘሬ፤ 7 ኔኤኒ ቢያ ባኣዚ"ና ኮሺ ባኣዚ" ማዲ ማዲ ዔይቶም ኮኣከንሣ ማዔ፤ ኔ ዔይቶ ዔርዘ ዋዶ"ና ኮይሳ ጎይሣና ናንጊሣ፡ ጎኔ ሓይሴ ጌሰቲሣ፡ 8 ደንከንቴዋ ኮሺ ጌኤሲ ዔይቶም ዳዌ፤ ዔይይዲያና ኑና ዒፂ ማካ ዓሳ ኑጊዳ ጌሰቶንዶ ፑርታ ባኣዚ" ዴንቁባኣ ዋዶ"ና ቦርሲንታንዳኔ።

9 ማዳ ዓሳ ማዳሻ ዓሶም ዓይሣንታንዳጉዲ፡ ቢያ ባኣዚ"ና ዔይቶ ዋዘሳንዳጉዲ ሃሣ ፑርታ ዑኡሲያ ዔይቶም ማሁዋጉዲ፡ 10 ዋይሣ ዓሶኮ ዓኣ ባኮዋ ዉኡቁዋጉዲ ዘሬ፤ ኑና ዳቁሻ ያኦዘሣኮ ዔርዚያ ቢያ ባኣዚ"ና ቦንቾንታንዳጉዲ ቢያ ዋዶ ጉቤ ዒናፓ ጉሙርቁንታያ ዔይታ ማዎንጎ።

11 ያኦሲ ዓሲ ቢያ ዳቁሻ፡ ኮሹሞ ዒንጊሣ ፔጋሲ ዳዌኔ፤ 12 ዔይ ኮሹሞ ዒንጊያ' ጎሜ ዓሲ ማዒሣና ዓሲ ማላሣ ሱኡኬ ኑ ሃሻ"ንዳጉዲና ኑና ኑ ዔሪ ዋይሥሣና፡ ሃሣ ፃሉ"ሞና ጊንሣ ዓያናና ዓኣ ዓሲያ ማዒ ሓያ ሳይዳ ኑ ናንጋንዳጉዲ ኑና ዔርዘኔ። 13 ዔይይዲ ኑ ዓንጅንቴ ኑኡኮ ሃጊ ማዓንዳ ዋዘ" ካፓኔ፤ ዔይ ኑኡኒ ካፓ ሃጊ ማዓንዳ ዋዘ፡ ዳኤፖ ኑኡኮ ጎዳሣ፡ ኑና ዳቁሻ ዔሱሰ ኪሪሰቶሴኮ ቦንቾና ሙኪ ጴዲያኬ። 14 ኪሪሰቶሴ ፑርታ ባኣዚ"

ቢያይዳጋ ኑና ደቁሻኒና ኮሺ ማዶ ማዳኒ ጎኑባ ማዕያ ሃሣ ዒዛም ኑ ዲማዳያ ጌኤሺ ዓሲ ማዓንዳጉዲ ኑና ጌኤሻ"ኒ ኑ ጋይቲ ፔና ዓኣሣ ዒንጌኔ።

15 ዓካሪ ሃንሣ ባኮ ዔርዘ፤ ጉቤ ማዕ ቢታንቶና ዓሶ ዘሬ፣ ሃሣ ጎሬ፤ ያኣኒያ ኔና ቢሆጋ።

3

ኪሪሰቶሴ ጉሙርቃ ዓሲ ማዳንዳ ማዶ

1 ዓሳ ቢያ ዎይሣ ዓሶና ቢታንታ ዓኣ ዓሶናም ሹሌዑሞና ዓይሣንታንዳጉዲ ሃሣ ኮሺ ማዶ ቢያ ማዳኒ ጊኢጌያ ማዓንዳጉዲ፣ 2 ያ ዑሣዳኣ ፑርታ ባኣዚ" ጌሰቱዋጉዲ ዔያቶም ላቲ" ኬኤዘ፤ ዩያይዳጋ ዓሲና ዎላ" ፑርቱዎያ፣ ኮሺ ዓሲ ሃሣ ጎኔ ዒናጋ ዓሲ ቢያም ሹሌዓያ ማዶንጎ፤ 3 ኑኡኒ ሃያኮ ቤርታ ማሊሣባኣያ፣ ዔኤያ፣ ዓይሣንቲ ዒፃያ፣ ዳቢንቲ ጌሺንታያ፣ ዲማ ዲማ ፑርቶ ኑ ማሊያ ሱኡኮ ኩንሣያ፣ ጌኔ ማዶ ማዳያ ሃሣ ቂኢራያ፣ ዑራዲያና ዎሊ ሴካና ሃንጋና ዒፃያ ማዒ ኑ ናንጋያኬ። 4 ጋዓንቲ ኑና ደቁሻ ያኣዛሢኮ ኮሹሞና ናሹሞና ፔጋዴ ዎደ"ና፣ 5 ኑ ማዳ ዒሉ"ሞ ማዶናቱዋንቲ ፔኤኮ ማኣሪዎና ኑና ዒ ዳቂሹኔ፤ ኑና ዒ ዳቂሹሣያ ላሚ ሸይንቲሣ ማዕ ማሰቲሣና ዓያኖ ጌኤዦ ዛሎ"ና ጳዴ ላኣሚንቲናኬ። 6 ያኣሲ ኑና ደቁሻ፣ ዩሱሰ ኪሪሰቶሴ ዛሎ"ና ፔኤኮ ዓያኖ ሚርጌና ኑም ኬይሴኔ። 7 ዩያ ዒ ማዳሣ" ዒዛኮ ኮሹሞ ዒንጊዳና ኑ ዒሊ"፣ ሃጊ ማዓንዳ ዎዛ ማሃ ኑ ካጋ ናንጊና ናንጎዋ ኑ ዴንቃንዳጉዲኬ። 8 ሃይ ታ ኔኤም ኬኤዘ ባካ ቢያ ጎኔ ባኣዚ"ኬ።

ያኣሲ ጉሙርቃ ዓሳ ቢያ ኮሺ ማዶ ደዲ ማዳንዳጉዲ፣ ሓያ ታ ኔኤም ኬኤዘ ባኮ ቢያ ደዲሺ ዔያቶም ኔ ኬኤዛንዳጉዲ ታ ኮዓኔ፤ ዩይ ባካ ኮሺ ማዕያ፣ ሃሣ ዓሲም ኮይሳ ባኣዚ"ኬ። 9 ጋዓንቲ ጋሡሞ ማርሞይዳጋ፣ ዓሲኮ ዜርሣ ጋይዲ ሺሪዩይዳጋ ሃሣ ዓሲና ዣሊሣና ሙሴ ዔርዘ ዎጎ ዛሎ" ዔቃ ጎሪ"ንቲዳጋ ሃኬ፤ ዓይጎር ጌዔቲ ዩይ ባካ ጋሣ ባኣዚ" ባኣያና ጉሪ ማዕ ባኣዚ"ታሣሪኬ። 10 ሺኢጲያ ማኣር ዓሶ ዎሊጋ ዲማሳ ዓሲ ፔቲ"ና ዘሬ፤ ዩካጋ ሃሣ ላሚ ላቲ ዒዛም ኬኤዘ፤ ያጋ ዑሣ ዓኣዴቲ ጋዓንቲ ዒዛና ዎላ" ፔቲ" ማዒጋ። 11 ዩያጉዴ ዓሲ ዣኣሌ ዓሲኬ፤ ዒ ጎሚ ማዳሣሪ ፔ ዑፃ ሜቶ ዔኪ ዩዓያ ማዕሣ ዔሬ።

ጋጊንሣ ዘር

2:14 ዓይኑ. 130:8፤ ኬሲ. ማፃ 19:5፤ ላሚ. ዎማ 4:20፤ 7:6፤ 14:2፤ 1ጴ. 2:9።

12 ዓርፂማሴ፡ ሃንጎ ቲከቆሴ ኔ ኮይላ" ታ ዳካዛ ኔኔኒ ታ
 ዓኣ ቤዞ፡ ኒቆጲሊዮኔ ዑኩና ሙኬ፤ ዓይጎሮ ጌዔቴ ባርጎ ታኣኒ
 ዒዞ ቤዞይዳ ዴዒ ዓኣሣኒ ማሌሣሮኬ። 13 ዋጎ ኮሺ" ዔራ
 ዜማሴና ዓጲሎሴ ጎዖሣናም ኮይላ ባኮ ቢያ ዒንጊ ጎይፆ ዔያታ
 ዓኣጳንዳጉዲ ማኣዳ"። 14 ኑ ዓሶ ማዔ ዓሳ ማኣዳ" ባኣዚ" ባኣያ
 ማዒ ዓቱዋጉዲና ፔኤኮ ናንጎ ዔያታ ፔኤሮ ዳንዳዓንዳጉዲ ኮሺ
 ማጲ ማጲሣ ዔሮንጎ።

15 ታኣና ዋላ" ዓኣ ዓሳ ቢያ «ኮሺዳ?» ኔና ጋዓኔ፤ ፆኦሲ ጉሙርቃ
 ዓሶ ዛሎ"ና ኑና ናሽካ ዓሶም ቢያ «ዒንሣ ኮሺዳ?» ጌዔኔ፥ ጌዔ።
 ፆኦሲኮ ኮሺም ዒንጊፆ ዒንሣና ቢያ ማዖንጎ።

3:12 ዳኪ. ማዳ" 20፥4፤ ዔፕ. 6፥21-22፤ ቆላ. 4፥7-8፤ 2፯ሞ. 4፥12። 3:13
 ዳኪ. ማዳ" 18፥24፤ 1ቆሮ. 16፥12።

ጌጌዥ ማግኔግ
The Holy Bible in the Maale language of Ethiopia,
using Ethiopic script

copyright © 2015 The Word for the World International and The Bible Society of Ethiopia

Language: Maale

Translation by: The Word for the World

Contributor: Bible Society of Ethiopia

Maale New Testament

by Bible Society of Ethiopia.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-12-29

PDF generated using Haiola and XeLaTeX on 11 Nov 2022 from source files dated 29 Jan 2022

bbcfb90a-3ae3-5452-983d-6c4c02375929